

1 TIMOTI

Pol Mij Ned Ak Timoti Nop Tikak

¹ Yad Pol. God bi kasin gep chin ak ayip, Klays Jisas nop kod midobun ak ayip, kili apilminal yip agel, yad bi Klays Jisas takaw nop dad ameb ak midebin. ² Timoti, nad yad ayip Klays nop gos linopul tek ak, ni yad mideban. Pen mij anib ak nu kil tikil nep nebin. Bapi God chin ak ayip, Biawl chin Klays Jisas ayip, kili apilminal nep yimug ninid gitep gilig kod midel, midtep ginimin.

Takaw yepis apal ak ma dinimin

³ Yad bilel Masedoniya plopens amnig, nin anib ak takaw kiles timel nep aginek ak, miñil tepayan agebin. Nad taun Epesus midil, bi oginap kilop takaw kiles timel agenimin, chin God takaw agobun agil tay yepis agebal okok keliginigel. ⁴ Anoj agebal okok sek, apis based chin takaw agebal okok sek, keliginigel. Takaw anib okok agel gek, kilop sawl sek lek penpen agebal. God tap chinop ginig gup takaw ak agel, God takaw ne agek awl gipikop ak pen, takaw kili agebal anib okok ninid, Klays nop gos nigiginigel tek ak ma mideb. ⁵ Pen takaw kiles agebin ak jij ne ak anigil mideb, Klays binib ne kili penpen mapen yibil linigel. Kili ke nigtep yibil gil gos pal ak teplep won ak nig midil, chibol nab kili ayan midtep gil, Klays nop nokom gos linid genigel ak nim, penpen mapen

yibil linigabal. ⁶ Bi oginap kanib teplep anib ak keligil, sawl gil takaw yokip yokip ag amil apil gipal. ⁷ Chin bi God takaw agñeb okok midobun apal ak pen, takaw agñibal okok, takaw jij nim ak agobun agil, nigtep ma gipal. ⁸ Chin nopun, God takaw ne agak ak tep yibil mideb ak pen, bi kili God takaw ak dil wog teplep ma gel, tep ma ginigab. ⁹ Pen abe nopun, God takaw ak, ne binib teplep midtep gipal okok kilop kiles gil ma agñub. Mel yibil. Binib timel monmon gipal okok kilop kiles gil agñub. Binib God takaw tibilikipal okok, takaw teplep ak ma dipal okok, God nop kud ñil kidek ma gipal okok, tap si tap timel gipal okok, God gos ne nigup pal ak ma nepal okok, lum awl yil gos pal ak ninid kidek gipal okok, ñapay tikjakil nonim nap kili ke kilop ñapal okok, chip ñapal okok, God takaw ak kilop nep agñub. ¹⁰ Binib bin si bi si gipal okok, bi penpen chib migan gipal okok, bi kili okok nib dad apil wog giñeb kili kañ gel gipal okok, yepis apal okok, tay yepis agil chin ninid agobun apal okok, titay gilig God takaw yipid gil yibil ak agjuwil keligipal okok, God takaw ak kilop kiles gil agñub. ¹¹ Takaw ninid yibil anib ak, takaw teplep ak, God yip agek yad kilop agñibin. Takaw teplep nim ak chinop agek anigil nopun, God biawl milek sek ak, binib kili yib nop dad aplanibal.

God Pol nop mapen nigeke, nop tep yibil agup

¹² Biawl chin Klays Jisas, yip nigeke wog nop ak gep tek lup. Wog anib ak ne yip aglil kod midaknin

1:7 1 Ti 6.4, 6.20, Tat 1.10 **1:8** Lom 7.12, 7.16, 7.22 **1:9** Gal 3.19, 5.23 **1:10** Stt 19.4-5, 1 Ti 6.3, 2 Ti 4.3, Tat 1.9 **1:11** Gal 2.7, Kol 1.25, 1 Te 2.4, 1 Ti 6.15 **1:12** Apo 9.15, Gal 1.15-16

gipin ak, nop tep yibil apin. ¹³ Ned yad nop agjuwil, gi timel gil, takaw timel agil geligipin. Ne pen nigak, nop gos ma liniñid, takaw agak jij ak ma niñid genek nim, yip mapen niñid dak. ¹⁴ Biawl chin Klays Jisas, anigil yip yimug awl niñid gitep yibil gek, nop gos linigilig binib okok kilop mapen lipin. ¹⁵ Klays Jisas binib tap si tap timel gipal okok, kilop tig asik dinig lum awl owak. Takaw anib ak niñid yibil yek, chin niñid pisnep dinigun. Pen bi tap si tap timel adek awl yibil gup ak nim, yad nokom. ¹⁶ Pen Klays Jisas, yad bi kimigel midep ak niginigel agil gos nigup. Anib ak tek yad bi tap si tap timel adek awl yibil gipin ak pen, ne yip mapen niñid dup. Pen yip gup tek ak, bi oginap chinop abe anib anep ginigab agil gos nepal anib ak tek, Jisas nop gos liniñid pel pelnep yenigabal. ¹⁷ Ne Binonim pel midep ak, ma kumeb tek, miserj ma nopun ak, ne nokom God niñid yibil ak. Nop pel pelnep yib dad aplanil aginigun, Nad biawl yibil bi teplep yibil mideban aginigun. Yaw.

*Pol ne Timoti nop takaw olap agup, Nad Jisas
nop gos liniginimin agup*

¹⁸⁻¹⁹ Ñi yad Timoti, nep takaw oginap aginigebin. Bi God gos ñek agñeb okok, kili nep ned agilak tek ginimin. Takaw anib ak niñid agen, nad takaw yip ak dil, nigtep gil gos pal ak teplep won ak nig midilig, Klays nop gos liniginimin. Gos linigilig, takaw kiles timel yibil gil ag dad ame, tap

1:13 Apo 3.17, 8.3, 9.4-5, 1 Ko 15.9-10, Gal 1.13 **1:14** Luk 7.47, Lom 5.20, 1 Ko 15.10, 2 Ti 1.13 **1:15** Luk 15.2, 19.10, Lom 5.8, 1 Ti 3.1, 4.9, 2 Ti 2.11, 1 Jo 3.5 **1:17** Dan 7.14, Jon 1.18, Lom 16.27, Hib 11.27, 1 Jo 4.12 **1:18-19** 1 Ti 3.9, 6.9, 6.12, Jud 3

timel gebal anib okok keliginigel. Bi oginap kili nepal, tap titimel oginap gipal. Kili pen God ne ke chinop gitep gan agil gos ma nepal. Anib ak, Klays nop gos nepal ak kidek pen, gos kili timel gak, sip kab kalanas ayan am chik ñub pisnep timel gak ak tek gak. ²⁰ Bi Himeneyus ayip, bi Aleksada ayip anib ak nep gil God nop agjuwelek, kilopminal keligipin. Keligen, Satan ñin kid ne ak linek midel minel yibil gek, God nop agjulek anib ak keliginimil tek lup.

2

Chin God nop agnigonigun, binib okok kilop midupsek giñinimun

¹ Anib ak tek, yad takaw adek olap agebin, tap ned ak nibi aniginimib. God ayip agilig, nop agniñid, tep yibil agil, binib okok kilop midupsek giñinimun agil aginimib. ² Gapman binonim okok sek gapman biawl okok sek, God kilop abe giñinimun agniginimib. Agnigenigabim anib ak tek, chin kimigel midtep gil, God nop gos nigilig kidek yibil gilig yonigun. ³ God ayip takaw agobun anib ak, tap tep yibil, God nop tep yibil gup. God bi kasin gep chin ak, ⁴ ne binib okok midupsek kilop tig asik den, takaw niñid yibil ak nigilan agil nigup. ⁵ Chin nopun, God nokom olap mideb. Pen bi nab nib ak, ne abe nokom olap mideb. God piskid ak mideb, chin binib okok piskid ak midobun, bi nab

1:20 1 Ko 5.5, 2 Ti 3.7-8, 4.14-15 **2:1** Jer 29.7, Ese 6.10, Lom 13.1, Epe 6.18, Plp 4.6 **2:4** Ese 18.23, Jon 3.16-17, 17.3, 1 Ti 4.10, 2 Ti 2.25, 2 Pi 3.9 **2:5** Lom 3.29-30, Gal 3.20, Hib 8.6, 9.15, 12.24

nib chin ak nim, Klays Jisas. ⁶ Ne binib midupsek dil God ayip jimñil lin agil kumak. Ñin anib ak God ne aglup, binib nigilan agil, Ñine nop agyokek apil, chinop nen kumak nim, miseñ nopun. ⁷ Adek anib ak, God nokom yip agek, bi Jisas takaw nop dad ameb ak midil, takaw nop agyikebin. Yepis ma apin, niñid apin. Binib Juda mel okok kilop agñitep gen, Klays nop gos linñid, takaw niñid yibil ak niginigel. ⁸ Anib ak gos yad anigil nepin, nibi apnan ginigabim anib ñin ak, bi okol kili God nop agilig yenigel. Kili suntep midilig, ñin dad aplanilig, milik ma niñid, penpen ma agil, kimigel midil God nop agilig yenigel.

Bin kili God nop kidek gil gitep gipal okok, mub goñ sek tek midebal

⁹ Pen takaw olap anigil mideb. Bin okok kimigel midtep ginigel. Kili chech tep ak nep yimil, midtep ginigabal. Chech yimnigabal anib okok, bi oginap kili niñid, gos timel oginap ma niginigabal. Kimig wij mubwak kili okok tap kuñay nep ma tib kadig ginigel. Bis, ñin kagol tap okok kuñay nep ma ginigel. Chech mani awl apal okok nep tawil yimin agil gos ma niginigel. ¹⁰ Kili pen God takaw ne kidek ginigun agil, binib okok kilop ditep ginigel. Ditep gil nim, kili mub goñ sek tek yenigabal. ¹¹ Pen God takaw aginigel won ak, bin okok takaw ma agil, kimigel midil niginigel. ¹² Yad bin okok kilop agen, tikjakil bi okok kilop kod midil, God

2:6 Mat 20.28, 1 Ko 1.6, Gal 1.4, Epe 1.7-9, 2 Te 1.10, Tat 1.3 **2:7** Apo 9.15, Gal 1.16, 2.7-8, Epe 3.7-8, 2 Ti 1.11 **2:8** Ais 1.15, Mal 1.11, Jon 4.21 **2:9** 1 Pi 3.3-5 **2:10** 1 Ti 5.10 **2:12** 1 Ko 14.34

takaw ma agñinigel. Kili kimigel takaw ma agil, takaw apal ak niginigel. ¹³ Takaw apin anib ak, jij ak aginigebin. God Adam nop ned gilil, kidek bin ne Yip nop gilak. ¹⁴ Pen takaw yepis agak ak, Adam ma nigak. Bin ak takaw yepis agak anib ak niñid, tap si tap timel gak. ¹⁵ Pen bin okok mubwak kili ak sek gos timud kili ak sek, kod midtep ginigel. Ñapay tikil, Klays nop gos nigilig, binib okok kilop mapen lilig, suntep midilig, tap anib okok midupsek gitep gilig yenigabal ak, God kilop tig asik dinigab.*

3

Bi Klays binib ne okok kilop kod midebal okok, kili kanib aj tep ginigel

¹ Takaw anib ak niñid yibil yek. Bi an Klays binib ne okok kilop kod midep wog ak ginim agil, gos tep yibil nigup. ² Pen bi olap Klays binib ne okok kilop kod midep ak yenim agil nigup ak, anigil yonimuj. Bi sayn tep, binib oginap nigel kilop tep ginimuj. Bin nokom olap dinimuj. Bi takaw sayn tep agil, gos nigtep gil, binib okok kilop gitep gek, nop agjunimuj tek ma lup. Ag dap kal miñan ne linimuj. Takaw agñi tep ginimuj. ³ Pen ñig kiles ñibil sawl ma linimuj. Kabiyam timel ma juwil, kilop takaw saynsayn aginimuj. Penpen ma aginimuj. Mani din agil gos kunay ma niginimuj. ⁴ Bin ñapay ne amiligon okok kilop kod midtep gek,

2:13 Stt 2.7, 2.21-22, 1 Ko 11.8-9 **2:14** Stt 3.1-6, 2 Ko 11.3 * **2:15**
 Glik takaw jij anib ak, chin nigtep ma gipun. **3:1** Apo 20.28, Epe
 4.12, Plp 1.1, 1 Ti 1.15 **3:2** 1 Ti 5.9, 2 Ti 2.24 **3:2** Tat 1.6-9

ñapay okok pen bapi niñid agup agil, nig dil kidek ginigel. ⁵ Pen bi olap, bin ñapay ne ke okok kod midtep ma ginigab ak, Klays binib ne okok kilop taydil kod midtep ginigab? ⁶ Bi miñil nep Klays nop gos nigup ak, bi kod midtep olap ma yonimuj. Bi miñil nep gos nigup anib ak, yad bi teplep yibil midil biawl midebin agil niginigab. Anigenigab, God bilel Satan nop bilok niñid yul awl ñak tek ak, kidek bi anib anop anib nep gek apyap pakinigab. ⁷ Bi kod midtep anib ak, binib Klays yil ma midebal okok nop niñid, bi teplep yibil agil niginigel. Bi anib ak pen teplep mel ak, binib Klays yil ma midebal okok nop agjunigabal. Agjuwel, apyap pakek, Satan gon ne ak dinimuj tek lup.

Bi Klays binib ne okok kilop wog giñeb okok, kili kanib aj tep ginigel

⁸ Anib ak tek, bi Klays binib ne okok kilop wog giñeb okok, binib oginap nigel kilop tep ginimuj. Jonib tam sek ma lil, ñig kiles kunay ma ñibil, mani tap okok chin nep dun agil gos ma niginigel. ⁹ Pen takaw niñid yibil ned we gup ak, miñil God ne misen agek gos nopun. Takaw niñid yibil anib ak, bi anib okok kili niñid, gos pal ak teplep won ak nig midilig, ditep gil nep yenigel. ¹⁰ Ned wog oginap aglem, titay dil tek ginigabal agil nig yenimib. Gitep gel, nibi agem, bi Klays binib ne okok kilop wog giñeb okok wog ak ginigel. ¹¹ Pen bin kili okok abe, binib oginap nigel tep ginimuj. Binib oginap kilop ma agjuwil, takaw sayn tep agil, gos nigtep gil, wog ginigel anib okok ditep ginigel. ¹² Pen bi Klays binib

ne okok kilop wog giñeb okok, bin nokom dil, bin ñapay ne amiligon okok kilop kod midtep ginigel. ¹³ Bi wog anib ak gitep ginigabal okok, binib nab okok yib tep ak dil, agyikil aginigabal, Chin gos niñid yibil won ak, Klays Jisas nop gos linopun aginigabal.

God takaw jij ne ak, tap awl yibil

¹⁴ Kasek ninigayn tek lup agil, takaw anib ak, nep mij ñu kil tikebin. ¹⁵ Pen yad kasek ma nenigayn, mij awl niñid, chin God binib ne okok, binib ne ayip titay dil tek yonigabun agil, nigtep ginigaban. God ne bi pel midep ak, chin binib ne pelpel apnan gil midobun. Chin jimñil kal meg kiles yibil tek midon nim, takaw niñid yibil ne ak dil, kiles timel yibil gil jakil midobun. ¹⁶ Chin nigtep yibil gipun, God takaw niñid yibil we gil mideb ak, miñil God ne misen agak. Jij ak misen agek gos nopun, ak tap awl yibil mideb. Takaw anib ak anigil agup,

Ne bi yibil lil misen apek, binib okok nop nigilak agup. God Kawnan ne ak anigil yomek, tap anigil gek, yipid gil amnak agup. Ensel okok nop nigilak agup. Ne anigak takaw ak, man okok okok amil binib okok kilop agñilak agup. Agñel, binib lum awl yil ak nop gos linigilak agup. Pen God ne nop dad adikid man ne alañ amek, yib awl yibil dak agup.

3:15 Epe 2.19-22, 2 Ti 2.20
Pi 1.12, 3.18

3:16 Mak 16.19, Jon 1.14, 16.8-9, 1

4

Takaw yepis apal awl, binib oginap niñid gos kilop gi timel gipal

¹ God Kawnan ne ak takaw agup ak misen nopun. Ñin kidek ak owakniñ, binib oginap Klays nop gos linepal ak keligil, kicheki walijpal gos yepis ñub adek ak niñid agñil, kidek ginigabal. ² Bi yepis agep anib okok, takaw yepis anib ak binib okok kilop agñinigabal. Pen nebeñ ma ginigab. Bi anib okok kili tap akal teplep tap akal timel agil ma niñid, takaw yepis yibil ag dad amil, monmon yibil agñinigabal. ³ Kili aginigabal, Bi okok bin ma dinigel, bin okok bi ma dinigel, tap midup oginap asik tep ginigel aginigabal. Pen God ne asikep takaw anib ak tek ma agup. Ne tap midup okok midupsek gilek, binib nop gos liniñid, takaw niñid yibil ne ak nepal okok, tap midup dil nop tep agilig ñiñinigel. ⁴ Chin nopun, God tap ne gilak okok midupsek, tep anep gilak. Chin tap ne gilak anib okok, tap timel agil ma niginigun. Nop tep yibil agil dinigun. ⁵ Anib ak tap ñiñinig nop agnigilig, takaw ne anib ak nigilig gipun tek, God ne ke gek, tap teplep ne anib okok mideb, ñiñinigabun.*

Timoti ne Klays bi wog giñeb teplep ne yonimun

⁶ Takaw agesipin anib ak mam ay okok kilop agñitep gil nim, Klays Jisas bi wog giñeb teplep

4:1 2 Ti 3.1, 1 Pi 1.20, 2 Pi 2.1, 3.3, 1 Jo 2.18, Jud 18, Lep 9.20, 16.14 **4:3** Stt 9.3, Lom 14.6, 1 Ko 8.8, 10.30-31, Kol 2.20-21, Hib 13.4 **4:4** Stt 1.31, Apo 10.15, Lom 14.14, 14.20, 1 Ko 10.25, Tat 1.15

* **4:5** Jisas ne agak, Tap ñiñeb okok midupsek tap teplep mideb, ñiñinimib agak. Tap ñiñeb olap tap asikep agil gos ma niginimib. Aposel 10.9-16 ayip Mak 7.19 ayip niginimib.

ne yenigaban. Pen takaw niñid yibil gos nopun ak sek, takaw tep agñibal ak sek ditep gil kidek gipan ak, nep gek, kiles awl dinigaban. ⁷ Pen tap lum awl yil kesim monmon okok sek, takaw timel okok sek kud ñinimin. God anigup tek ak nad abe kiles gil yenimin. ⁸ Binib kasek aplan apyan gipal okok, mubwak kiles kili sikol olap midek gipal ak pen, binib God anigup tek niñid, kiles gil gel amub okok, kilop gek midtep yibil ginigel. Anigel, God takaw aglup ak anigil agup, Miñil midtep gil, kidek midtep gil ginigabal agup. ⁹ Takaw anib ak niñid yibil yek, chin niñid pisnep dinigun. ¹⁰ God ne bi pel midep, bi kasin gep mideb. Ne binib okok midupsek tig asik din agil nigakniñ, binib nop gos linopun okok, chinop tig asik dup. Chin nop gos linopun okok, ne chinop gek midtep ginigabun gos ak niñid kod midobun. Anib ak nim God anigup tek niñid, minek minek kiles timel yibil gil nep gon amub.

¹¹ Takaw agebin awl, nad kiles gil agil, binib okok kilop agñenimin niñid kidek ginigel. ¹² Bi oginap nep ñisikol agil, nep keliginigel tek lup ak pen, anib ma ginigel. Pen gitep gil yibil ge amek, binib Klays nop gos linepal okok kili nep niñid, gitep gipan tek aniginigel. Gitep gipan anib ak, takaw tep apan tek, Klays kanib ne aj tep gipan tek, binib mapen lipan tek, Klays nop gos linepan tek, God widin midup ne adek sñak teplep mideban tek, kili niñid, abe aniginigabal. ¹³ Ninigayn ak

4:7 1 Ti 1.4, 6.20, 2 Ti 2.16, 2.23, Hib 5.14 **4:8** Sng 37.4, Mat 6.33, Lom 8.28, Kol 2.23, 1 Ti 6.6 **4:9** 1 Ti 1.15 **4:10** Sng 36.6, 1 Ko 4.11-12, 1 Ti 2.3-4 **4:12** 1 Ko 16.11, Tat 2.7, 2.15, 1 Pi 5.3

pen, yip kod mideban ñin awl, binib okok kilop, buk Baybol pi ak nigilig agñinimin. Jij ak anigil anigil mideb agil agñilig yenimin. ¹⁴ Ned bi Klays binib ne okok kilop kod midebal okok, kili nep ñin di midil agilak. Pen ñin anib ak, bi God gos ñek agñeb olap nep agak. Agek, God ne bi anib ak kiles timel yad ak dil, wog yad ginimin agil, kiles timel ne ak nep ñub. Anib ak, God nep kiles timel ñub tek, sawl ma ginimin, pen minek minek wog ne anib ak ginimin. ¹⁵ Takaw agesipin anib ak, nigtep gil gitep ginimin. Wog nad ak kiles gil gitep genimin, binib okok midupsek niñid niginigabal, wog gipan anib ak teplep yibil yenigab. ¹⁶ Tap nad gipan ak sek, takaw nad agñiban ak sek, nigtep gil yenimin. Anigil pel kiles genimin, God ne niñid, nad sek binib takaw nad nepal okok sek nibop tig asik dinigab.

5

Timoti binib okok kilop nigek, binib ne ke yibil tek ak midebal

¹ Bi milep okok kilop ma ag ginimin. Nap nad ke ak tek, agñi tep ginimin. Bi pilaj okok kilop, mam nad ke ak tek, agñi tep ginimin. ² Bin milep okok kilop, nanim nad ke ak tek, agñi tep ginimin. Bin pilaj okok kilop, nanay nad ke ak tek, agñi tep gil, kili ayip midil nigtep gil, God widin midup ne adek sinjak teplep yenimin.

Bin kanil okok, an kilop kod midtep ginigab?

4:14 Apo 6.6, 8.17, 13.3, 19.6, 1 Ti 1.18, 2 Ti 1.6

4:15 1 Ti 5.22

4:16 Apo 20.28, Lom 11.14, 1 Ko 9.22, Jem 5.20

5:1 Wkp 19.32

³ Bin kañil yimgeptek midebal okok, kilop gos tep niñid, kod midtep ginimín. ⁴ Pen bin kañil olap ñapay ñi apis ne oginap yenigel, kilop yomil agenimín, kili nop kod midtep ginigel. Wog anib ak wog awl yibil, God wídin midup adek ne sñak. Wog kili ned adek ak anigil mideb, nonim nap akan, naps nased okok kilop yimagililak tek, pen kod midtep ginigel. Anigenigabal, God nop tep ginigab. ⁵ Bin kañil yimgeptek mideb ak, God yip kod yenigab agil gos niñid, subnab maynab ayan God nop agilig, yip giñan agil God nop agnigilig nep mideb. ⁶ Pen bin kañil miñmiñ gi ajup ak, kim midebin agil gos nigup ak pen, nab ne kumil tek mideb. ⁷ Takaw anib awl, binib okok kilop age, kili gitep ginigel nim, binib oginap kilop ma niñid ag ginigabal. ⁸ Pen binib an, binib ne ke yibil okok kod midtep ma gil, binib ne jij nokom okok abe kod midtep ma gup ak, chin nopun, ne Klays nop gos ma niñid sawl gil nim, anigil gup ak. Binib Klays nop gos ma nepal okok, kili anigil ma gipal. Kili binib kili okok kilop tap oginap ñil kod midebal. Anib ak binib Klays nop gos ma nepal okok kili gi timel gipal ak pen, binib an ned Klays nop gos nigup ak pen binib ne okok kilop kod midtep ma gup ak, ne gi timel yibil gup.

⁹ Bin kañil anib okok yib kilop gilinig, bin anib ak tek niñid gilinimín. Sap yib ne 60 yonimuj ak niñid, yib nop gilinimín. Pen bin bine nokom olap midil, kumnimuj ak niñid, yib nop gilinimín. ¹⁰ Bin yib ne teplep yibil, wog okok midupsek keke

5:4 Mat 15.4, Epe 6.1-2, 1 Ti 2.3 **5:5** Luk 2.37, 18.1, 18.7, Apo 26.7, 1 Ko 7.32 **5:8** Ais 58.7, Mat 18.17, Gal 6.10, Tat 1.16 **5:10** Hib 13.2

gitep yibil gup ak niñid, yib nop gilinimin. Wog teplep ne ak anigil mideb. Ñapay ne ke kod midtep gil, binib okok nib okok nib ownigel ak, ag dap kal migan ne lil tap midup ñitep gup. God binib ne okok, tob kilop okok ñig pak ñitep gil,* binib koslam midil gos pal lig midebal okok kilop ditep gil, wog anib ak ke okok midupsek wog teplep yibil gup ak, yib nop gilinimin.

¹¹ Pen bin kanil pilaj nep midebal okok, yib kilop ma gilinimin. Chin nopun, Klays wog ak ginigabun aginigabal ak pen, mid dad amil, bi kidek dun agil gos niñid, Klays wog ak yilik niñid bi kideyil dinigabal. ¹² Dinigabal anib ak tek, takaw kili ke ned aglilak ak, takaw anib ak tibilikil miñel awl dinigabal. ¹³ Pen tap oginap sek anigil gipal. Kili tap oginap abe yilik niñid, yokip kal ak kal ak giñub ajipal. Kili pen yilik gup anib ak nep ma gipal, tap okok kunay nep gipal. Kili takaw ñig lil, takaw yepis anigipal anigipal agilig midebal. Takaw okok kunay yibil apal, chin agep tek ma mideb. ¹⁴ Anib ak bin kanil pilaj nep midebal okok, bi kideyil dil, ñapay tikil, kal kili ke wog gil kod midtep ginigel agil gos nepin. Kili anigenigabal, binib chinop milik nepal okok, chinop agjunigel tek ma linigab. ¹⁵ Pen chin nopun, bin kanil pilaj nep midebal okok, oginap kanib tep ak keligil, Satan nop kidek

* **5:10** Nibi Jon 13.1-17 niginimib. Bilel, kili anigil geligipal. Binib okok nib okok nib apeligipal ak, silkul dayday tob kilop okok doligup. Anib ak, binbi oginap kal nad apel, tob silkul dayday kilop okok ñig pakñeligipan. Wog anigep okok, binib wog giñeb kili ak anigil geligipal. Jisas pen, bine okok kilop anigil agup, Nibi ke anigil bi oginap wog giñeb kili ak yenimib agup. Matyu 20.25-28 niginimib.

gipal.

¹⁶ Pen bin olap Klays nop gos linigup ak, bin kanil ne oginap kilop kod midtep ginimuj. Anigenigab, bin kanil okok keke binib kili ak keke kod yenigel, binib God yil okok koslam gep tek ma ginigabal. Pen binib God yil okok, kili bin kanil yingep tek midebal okok kilop, kod midtep ginigabal.

Bi Klays binib ne okok kilop kod midebal okok, kilop ditep ginigun

¹⁷ Bi Klays binib ne okok kilop kod midil, wog gitep gipal okok, kilop yib awl yibil nil, kab kilop oginap sek nittep ginimib. Pen bi kili oginap kiles gil God takaw jij ak apal akan, binib okok kilop agnibal okok, gipal gipal anib ak tek, kilop ned ninid yib awl yibil nil, kab kilop oginap sek nittep ginimib. ¹⁸ Buk Baybol agil tikak ak nopun. Pen anib agak,

Nibi chag bulmakaw ponid apil, wit midup tap okok taw chib jakek, midup okok ke amil, cheg okok ke amil gan agil, meg migan nop ak ma tunig tibikinimib agak. Wog gilig, oginap nininig nininimuj agak.

Pen takaw olap nopun, anib agak,

Bi wog gup ak, kab ne dinimuj agak.

Anib ak bi Klays binib ne okok kilop kod midebal, wog gitep gipal okok, kab kilop ak nittep ginimib.

¹⁹ Bi olap nep apil aginimuj, Bi Klays binib ne okok kilop kod midep anib ak, anigil anigil tap timel gup agonimuj ak, ak ma niginimin. Bi ominal

5:17 1 Ko 16.18 **5:18** Lo 25.4, Mat 10.10, Luk 10.7, 1 Ko 9.9

5:19 Lo 17.6, 19.15, 2 Ko 13.1

akanj, omiñal nokom pen niñid apil agenigabal, niñid apal tek lup agil, niginimin. ²⁰ Pen bi Klays binib ne okok kilop kod midebal oginap, tap si tap timel genigel, kilop timud wukinimin. Binib okok midupsek nig midelakniñ, kilop timud wukinimin. Anigenigaban, oginap pilikil ma ginigabal.

Timoti ne ke kod midtep ginimuj

²¹ Takaw agesipin anib awl, anib anib ginimin agesipin ak, yokip ma agebin. God ayip, Klays Jisas ayip, ensel aglep ne okok ayip kili nig midelakniñ, nep aniginimin takaw awl agebin. Pen binonim nak okok sek, bi nak okok sek, kilop nep gitep ma ginimin. Kilop gipan tek, binib okok midupsek kilop giñinimin. ²² Pen bi God wog gep olap dinig, nigtep yibil gil, nop ñin di midilig aginimin. Bi anib okok, oginap tap si tap timel genigel, nad ayip ma ginimin. Mel. Nad ke suntep nep yenimin. ²³ Pen nep minek minek tap gil, kogmeg gup ak, ñig anep ma ñinjinimin. Ñig wayn sikol oginap sek ñibe sun linimuj. ²⁴ Bi oginap tap si tap timel gipal ak misen lup. Ak tek ak chin nopun, tap kili gipal anib okok timel yibil gup. Bi oginap pen tap si tap timel gil we gipal ak, kidek misen linigab. ²⁵ Anib ak tek, binib oginap tap gitep gipal ak, abe misen lup. Pen gitep gipal ak oginap kasek misen ma lek, pel we gil yonimuj tek ma lup.

6

Bi wog giñeb okok, biawl kili okok niñid wog gitep

5:20 Lo 13.11, Gal 2.11, 2.14, Epe 5.11, Tat 1.13 **5:21** 1 Ti 6.13,
2 Ti 2.14, 4.1 **5:22** Apo 6.6, 13.3, 1 Ti 4.14, 2 Jo 11

ginigel

¹ Pen binib wog giñeb okok midupsek, kili biawl kilop taw dad owlak okok ditep gil, yib kilop dad aplanigel. Anigenigabal, biawl kili okok niñid, God nop ma agjuwil, takaw tep agñibun ak ma agjunigel. ² Pen binib wog giñeb olap, biawl ne abe bi Klays nop gos linigup ak, bi wog giñeb ak gos anib ak ma niginimun. Biawl yad ak ne mam yad mideb, takaw ne aginimun ak yad kidek ma ginigayn agil, gos ma niginimun. Pen mam tep yad Klays nop gos linigup ak, yad nop kidek gil wog nop ak giñinigayn agil, wog nop ak giñi tep ginimun. Takaw agebin awl, binib wog giñeb okok kilop agñi tep ge gitep ginigel.

Mani kuñay dun agil gos nepal, jij anib ak timel gup

³ Bi olap, ne Biawl chin Jisas Klays takaw yipid gil yibil agak ak sek, God takaw pel agñibun ak sek keligil, takaw ne ke pal oginap agñil nim, ⁴ yad nep biawl midebin agil, sawl lek agup. Bi anib ak gos ne ak timel gek, tap sikol oginap nen agil, bi oginap ayip penpen apal. Pen takaw anib ak anigil agek, bi oginap chibol kilop ak timel gil, penpen ag amil apil gil, penpen agjuwil, binib okok kilop gos timel niñid, ⁵ minek minek bi oginap kilop milik nepal. Bi anigil gipal okok, gos kili ak timel yibil gil, sawl sek lek, takaw niñid yibil ak ma nepal. Kili anigil gos nepal, chin God anigup tek ak kiles gil yonigun, tap kuñay yibil dinigabun

6:1 Lom 2.24, Epe 6.5, Kol 3.22, Tat 2.5, 2.8-9, 1 Pi 2.18 **6:2** Kol 4.1, 1 Ti 4.11, Plm 16 **6:3** Gal 1.6-9, 2 Ti 1.13 **6:4** 1 Ko 8.2, 1 Ti 1.4, 1.7, 2 Ti 2.23, Tat 3.9 **6:5** 1 Ko 11.16, 2 Ti 3.8, 4.4, Tat 1.11, 1.14, 2 Pi 2.3

agil gos nepal. ⁶ Chin pen God anigup tek ak kiles gil midilig, miñmiñ gil nim, God tap teplep ne ak dil midtep ginigabun. ⁷ Chin nopun, ami sikop chinop tikilak ñin ak, tap olap dad ma ownok. Pen kumnigabun ñin ak, tap olap dad ma amnigabun. ⁸ Anib ak, chech tap ñineb chin oginap yonimuj, tap sikol dinigun ak aginigun, chin tek nim dipun ak. ⁹ Pen binib tap kunay dun agil gos nepal okok, Satan kilop yepis agil gos kilop ak tunig lipig dad amek, sab chag tap okok gon lel dup tek ak kilop dinigab. Sawl sek lek monmon gel amek, apyap pakil pisnep kul ginigabal. ¹⁰ Binib mani tap okok gos kunay nepal okok, tap timel okok kunay yibil gel amnigab. Oginap mani tap okok dun agil gos nepal ak, Klays nop gos linepal ak keligil, midtep ma gel, yakam tek ak chibol kilop ayan punilek, kilop ke chib timel yibil gup.

Pol Timoti nop takaw teplep yibil ak, takaw kiles timel yibil agup

¹¹ Pen nad God bine yibil ak, bi oginap gi timel gipal tek ma ginimin. Tap nim ak pen aniginimin. Bi teplep yibil midil, God anigup tek ak kiles gil midil, Klays nop gos linid, binib okok kilop mapen lil, kiles timel gil minel okok dil, tap okok binib okok kilop ginig, kimigel ginimin. Adek anib ak nep ge amnimuj. ¹² Bi Klays nop gos kiles timel gil nigup ak, ne bi kabiyam timel yibil tek mideb.

6:6 Sng 37.16, Snd 15.16, Plp 4.11-12, 1 Ti 4.8, Hib 13.5 **6:7** Jop 1.21, Sng 49.17, Snd 27.24, Sav 5.15 **6:8** Snd 30.8, Hib 13.5 **6:9** Snd 23.4, 28.22, Mat 13.22, 1 Ti 1.19, 3.7, Jem 5.1 **6:10** Kis 23.8, Lo 16.19, Epe 5.5 **6:11** 2 Ti 2.22 **6:12** 1 Ko 9.25-26, 1 Ti 1.18, 2 Ti 4.7

Gos ne kiles timel yibil mideb. Anib ak tek nep agebin, gos nad ak kiles timel yibil gil niñid, gos nigtep gil ginimin. Ned won ak God nep aglil, pel pelnep yenimin agil dinig gek, binib kunay nig yelak. Yelakniñ aginak, Klays nop gos linepin aginak. Apan tek, kiles gil yibil ge amek nim, pel pelnep yenigaban. ¹³ God ne gek tap okok midupsek kim mideb. Klays Jisas ne Podiyus Paylat nop takaw misen agak. God ayip Klays Jisas ayip nig midilekniñ, nep kiles gil agebin. ¹⁴ God takaw tep dipan ak, kiles gil kidek ginimin. Anigenimin, binib oginap kili niñid nep takaw ma dinigel. Nad takaw anib ak kidek gil yipid gil ma gipan ak ma aginigel. Gitap gil kidek ge amek amek, kidek Biawl chin Jisas Klays misen ownimunj. ¹⁵ Pen Jisas ownigab ñin anib ak, God ne ke aglak. God ne binib ditep gek yib nop dad aplanibal. Ne nokom bi niñid yibil ak, tap okok midupsek kod mideb. Ne ke binonim okok midupsek binonim kili ak mideb, biawl okok midupsek biawl kili ak mideb. ¹⁶ Ne nokom kumnimunj tek ma mideb. Milek tep ne ak ke yibil mideb, binib jiiñ sijnak amnigel tek ma lup. Bi olap nop ma yibil nigup, pen bi olap nop niginimunj tek ma yibil lup. Anib ak tek, binib okok yib nop dad aplanigel, kiles ne ak midil kilop pel pelnep kod yonimunj. Yaw.

Pol ne binib Klays yil midil tap kunay yek okok kilop takaw agñub

6:13 Jon 5.21, 18.36-37, 19.11, 1 Ti 5.21, Lep 1.5 **6:14** Plp 1.6, 1.10, 1 Te 3.13, 5.23 **6:15** Lo 10.17, 1 Ti 1.11, 1.17, Lep 17.14, 19.16

6:16 Kis 33.20, Jon 6.46, Plp 4.20, Jud 25

17 Binib tap mani tap kuñay lum awl mideb okok kilop takaw kiles timel age, yib kili ke ma dad aplanigel, tap kasek kul gup anib okok gos ma niginigel. God ne chinop kod midek, tap ma tek dek midtep gil miñmiñ ginigun ak pen, nop nokom gos niginigel. 18 Anib ak kilop age, tap gitep yibil ginigel. Tap teplep lum awl kuñay mideb okok anib ak tek, binib oginap kilop abe ñitep ginigel. Kilop pelpel gitep yibil ginigel. Pen tap kili kuñay okok, tap chin ke mel, binib okok kilop ditep gun agil, tap monmon ñinigel. 19 Anib ak tek gil nim, tap kili kuñay dilitep gil, kidek kili ke midtep ginigabal. Konjim midebal ak, añin ninjid yibil lup ak dinigabal.

Pol ne Timoti nop takaw kidek agñub

20 Timoti, God takaw ne ak sek wog ne ak sek nep ñub ak, nad ditep gil kod midtep ginimin. Takaw okok nib okok nib ak God gos ne mel ak, kud ñinimin. Pen takaw yepis yibil ag amil apil gil apal, Chin bi gos nigep okok midil, gos tep nigtep gobun apal, takaw anib ak nad kud ñinimin. 21 Bi oginap gos timel anib ak dilig, kanib tep adek Klays nop gos linepal ak pisnep keligipal.

God nibop yimug ninjid gitep ginimuj.

6:17 Sng 62.10, Mak 10.24, Luk 12.20-21, 1 Te 1.9 **6:18** Lom 12.13, Gal 6.6, Tat 3.8, Hib 13.16, Jem 2.5 **6:19** Mat 6.19-20 **6:20** 1 Ti 4.6-7, 2 Ti 1.14, 2.14, Tat 1.9, Lep 3.3 **6:21** 1 Ti 1.16, 1.19, 2 Ti 2.18

Jisas Klays Takaw Telep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022

24d09cce-9a93-523a-afa5-7b091c264cee